

## „Ein singendes, klingendes Bäumchen“

Mei Freindin, es Gerda H?ncu, hat mer mol wieder vun frieher verzählt:

„Mir ware Kinner. Mei Schwester, es Helga, des war vier Johr jinger als ich un immer in Bewegung. Es hat nie ruhich sitze kenne oder staad gehn, es hat immer renne misse. Es war an eem Sunntach im Summer. Mir han selmols grad neiji Kleider kriet, ware dermit in der Kerch un nohmittachs han mer wille ins Mosi gehen. Die Mutti hat gsaat, es wär doch aa de Tirolerrock gut, dorte im Kino sin die Bänk nit so sauwer un es is schad, dass die Stambakleider gleich dreckich un gewäscht gin misse. Doch es Helga hat nit geruht, bis mer die neije Kleider anziehe han derfe. Selmols han mer de Film: „Ein singendes, klingendes Bäumchen“ angeschaut, es war eener vun de erschte deitsche Filme, der ufm Dorf geloff is. Bis mer aus dem Mosi rauskumm sin, war e Dunnerwetter voriwergang, es Plaschter war noch voller Wasser un natierlich aa die Grawe.

Vum Kino bis hem zu uns war nit gar weit. Doch des Helga hat sich nit vun mer anphacke gelosst, dass mer scheen wie zwaa Schwestre newenaner hemgehn. Nee, es is hin un her ghupst un ufmol wars mer schon phaar Schritt voraus – je geger e Grawe. Un hat dorte derdriwert hupse wille. Die Fiess ware natierlich zu korz – un wups dich hats Helga im Grawe im Wasser ghuckt. Un die Träne sin nor so geporzelt, weil des Stambakleid war voller Dreck. Mer hat nitemol me die rote Bliemcher druf gsiehn.

Derhem han mer alli zwaa gschennt kriet, ich weil ich nit owacht gin han, un es Helga weils geckich war. Doch die Oma hat des Kleid schnell ingewaicht un es Helga is mit eem Schnuppe dervun kumm“.

Beschter DEFA Märchenfilm

Weil schon die Red war vun dem Film „Ein singendes, klingendes Bäumchen“, han ich nohgschaut, was es dermit uf sich hat. Der Film soll de beschte Märchenfilm sin, er is im Johr 1957 in der DDR bei DEFA (Filmunternehmen der ehemaligen DDR) gedreht gin. Die Handlung beruht uf eem Teel der Märchengschicht vun de Brieder Grimm. Es sin ganz vill Märchenfilme gedreht wore. Do e phaar Beispiele: „Das kalte Herz“, „Der kleine Muck“, „Das tapfere Schneiderlein“, „Schneewittchen“, „Rotkäppchen“, „Frau Holle“, „König Drosselbart“, „Dornrösche“, „Froschkönig“, „Der Eisenhans“ un vill anri.